

Byko ehf.  
Skemmuvegi 2a  
200 Kópavogi

Reykjavík 10. september 2021  
UST202104-176/H.I.I.  
07.06.02

### **Niðurstöður eftirlits með markaðssetningu og merkingu sæfivara á markaði**

Umhverfisstofnun fór í eftirlit með sæfivörum á markaði hjá Byko ehf. Breiddinni þann 25. júní 2021. Undir umfang eftirlitsins féllu allar sæfivörur í vöruflokkum 7, rotvarnarefni fyrir yfirborðsfilmu; 8, viðarvarnarefni; 14, nagdýraeitur; 18, skordýraeitur, mítlasæfar og vörur til að verjast öðrum liðdýrum og 21, gróðurhindrandi vörur, sem Byko ehf. býður fram á markað.

Skoðað var hvort að vörurnar uppfylltu skilyrði um markaðsleyfi skv. reglugerð nr. 878/2014 um sæfivörur, sbr. reglugerð (ESB) nr. 528/2012 og hvort að vörur með markaðsleyfi, uppfylltu skilyrði um flokkun, pökkun og merkingu skv. sömu reglugerðum. Jafnframt var skoðað hvort merkingar væru í samræmi við reglugerð nr. 415/2014 um flokkun, merkingu og umbúdir efna og efnablandna, sbr. reglugerð (EB) nr. 1272/2008.

Eftirlitið náði til 15 sæfivara, sem eru til sölu hjá Byko ehf. Tvær varanna eru framleiddar eða fluttar inn af öðrum birgjum en Byko ehf. og eru niðurstöður eftirlitsins tilkynntar viðkomandi birgjum sérstaklega. Byko ehf. er birgir eða innflutningsaðili hinna 13 varanna og reyndist engin þeirra uppfylla skilyrði reglugerðar nr. 415/2014 um flokkun, merkingu og umbúdir efna og efnablandna, sem sett er á grundvelli efnalaga nr. 61/2013. Um umfang og niðurstöður eftirlitsins, þær kröfur sem gilda um markaðsleyfi og merkingar og þau frávik frá tédum kröfum sem eftirlitið leiddi í ljós vísast til meðfylgjandi eftirlitsskýrslu.

Umhverfisstofnun veitir Byko ehf. frest til 8. október 2021 til að senda stofnuninni afrit af merkimiðum fyrir eftirfarandi vörur:

- Byko viðarvörn 1 L
- Akryl Fasademaling
- Herregård Exclusive Oljemaling
- Herregård Maximal Dekkende
- Herregård Terrassebeis
- Herregård Treolje XO
- Herregård Dør og Vindu Dekkende
- Oljebeis Eksteriør
- Oljegrunding Eksteriør
- Pliolite Murmaling – Mur og Betong
- Terrassebeis Basic,

ásamt staðfestingu að bætt hafi verið úr fráviki vegna áþreifanlegrar viðvörunar fyrir vöruna Byko viðarvörn 1 L, sem og staðfestingu á að bætt hafi verið úr fráviki vegna úreltra hættumerkja á vörunni Herregård Maximal Dekkende í litunum Base Gul og Base Oker.

Úrbætur skulu sendar Umhverfisstofnun merktar málnúmerinu UST202104-174. Rafræn skjöl sendist á [ust@ust.is](mailto:ust@ust.is).

Umhverfisstofnun veitir Byko ehf. hér með frest til 17. september nk. til þess að koma sjónarmiðum sínum á framfæri, sbr. 13. gr. stjórnsýslulaga nr. 37/1993.

Vakin er athygli á því að í samræmi við 5. mgr. 49. gr. efnalaga mun Umhverfisstofnun birta á vefsetri sínu upplýsingar um niðurstöður eftirlits og til hvaða úrræða stofnunin hefur gripið jafnóðum og ákvarðanir um slíkt liggja fyrir. Bréf þetta og meðfylgjandi eftirlitsskýrsla verða birt á vefsetri stofnunarinnar. Telji fyrirtækið að efni í bréfinu eða eftirlitsskýrslunni varði hagsmuni sem njóta eigi leyndar skal fyrirtækið tilkynna um það til Umhverfisstofnunar og rökstyðja ástæður þess að efni skýrslunnar ætti að njóta leyndar fyrir 17. september nk.

Umhverfisstofnun vekur athygli á því að þótt aðeins séu gerðar kröfur varðandi þessa tilteknu vöru gæti verið þörf á úrbótum varðandi fleiri vörur hjá fyrirtækinu til að þær standist kröfur efnalaga eða reglugerða settra á grundvelli þeirra.

Umhverfisstofnun vekur einnig athygli á því að samkvæmt XIII. kafla efnalaga er stofnunni heimilt að beita þvingunarúrræðum til að knýja á um framkvæmd ráðstöfunar samkvæmt lögnum, til að mynda með áminningu sbr. 55. gr., álagningu dagsekta sbr. 56. gr., og stöðvun markaðssetningar sbr. 57. og 58. gr. Jafnframt er vakin athygli á því að samkvæmt gjaldskrá fyrir verkefni og þjónustu Umhverfisstofnunar nr. 535/2015 innheimtir stofnunin tímagjald vegna eftirfylgni eftirlits og beitingu þvingunarúrræða, sbr. 30. gr. gjaldskrárinnar.

Upplýsingar um sæfivörur má finna á heimasíðu Umhverfisstofnunar<sup>1</sup>.

Fyrirtækinu er velkomið að leita til sérfræðings stofnunarinnar, Hafdísar Ingu Ingvarsdóttur, til að fá nánari upplýsingar um sæfivörur í síma 591 2000 eða í gegnum netfangið [hafdisi@ust.is](mailto:hafdisi@ust.is).

Virðingarfyllst,

*Hafdís Inga Ingvarsdóttir*  
Hafdís Inga Ingvarsdóttir  
sérfræðingur

*Bergdís B. Bæringsdóttir*  
Bergdís Björk Bæringsdóttir  
sérfræðingur

<sup>1</sup> <https://ust.is/atvinnulif/efni/saefivorur/>